

# L'agricultura procura per discussiun

Quater iniziativas pretendan adattaziuns constituziunalas en connex cun l'agricultura

DAD ANDRES CADONAU / ANR

■ **L'agricultura svizra fatschenta vivand la politica federala e baud u tard il suveran. Betg main che quatter iniziativas èn actualmain inoltradas che sa fatschentan cun l'agricultura. L'iniziativa lantschada da la Uniun purila svizra ha gia occupà il parlament. Il cussegl dals chantuns ha preschentà ina cuntraproposta a l'iniziativa.**

Che l'agricultura e la politica agrara occupan la populaziun svizra è indiscutabel. Da quai dattan quatter iniziativas perditga, iniziativas lantschadas ils davos dus onns e che han chattà las suttascripziuns necessarias. L'entschatta ha la uniun purila fatg cun sia iniziativa per la segirezza alimentara inoltrada la stad 2014 cun 150 000 suttascripziuns rimnadas en sulet trais mais. Ella pretenda adattaziuns en la constituziun per rinforzar la produziun indigena da mangiativas e proteger meglier la surfatscha culturala. L'atun 2015 ha la Partida verda surdà a la chanzlia federala sia iniziativa che sa numna Fair-Food. Sia egliada fiera l'iniziativa dals verds sin ina produziun ecologica ed adequata a la natira dals animals. Dentant vul l'iniziativa ina definiziun constituziunala che pretenda ils medems standards ecologics ed adequats a la proteziun dals animals che valan en Svizra per mangiativas importadas. La primavaira passada ha Uniterre, ina organisaziun purila activa plitost en la Romandia, inoltrà sia iniziativa per la suveranità alimentara che pretenda definiziuns pli rigurusas en la constituziun medemamain per proteger la produziun indigena. Cun augmentar il dazi sin imports e rinforzar la proteziun al cunfin. Schizunt mesiras per augmentar il dumber da persunas activas en l'agricultura vul Uniterre stipular en la constituziun e medemamain dapli proteziun per la surfatscha culturala. E



L'agricultura da muntogna sto sa defender per sia cumpart a la petta agrara.

FOTO H. KRAPP

lura ha anc l'iniziativa a favur dal biestg cun corna cuntanschì il dumber necessari da suttascripziuns.

## Proteziun, suveranità e mangiativas producidas fair

Per tempra en la discussiun politica procuran las quatter iniziativas senza dubi. En scadin cas n'han tuttas quatter betg retschavì il sustegn dal cussegl federal. Principalmain vers las finamiras dad augmentar la proteziun al cunfin ha la regenza svizra fatg valair tschertas resalvas pervia dad ulteriurs contracts da commerzi cun l'exteriur. In dals motifs prin-

cipals per proponer al parlament da renviar las iniziativas dals verds e dad Uniterre. La iniziativa da la uniun purila ha il cussegl federal medemamain renvià, dentant stipulà per mauns dal cussegl naziunal ina cuntraproposta. Il cussegl naziunal ha dentant acceptà, bain ualti stretg, l'iniziativa da la Uniun purila svizra. Ina iniziativa ch'il cussegl dals chantuns da sia vart ha renvià per acceptar ina cuntraproposta formulada da sia atgna cumissiun. Ina cuntraproposta ch'il cusseglier naziunal *Duri Campell* valitescha per pli «griffig» visavi l'iniziativa da la uniun purila. Per exempel ha il cusseglier

naziunal e pur numnà la definiziun da la segirtad da l'alimentaziun che l'iniziativa vul «segirar», la cuntraproposta dal cussegl dals chantuns dentant «rinforzar». Cun ina emprima egliada pon ins valitar questas differenzas per piculezzas. Campell percenter ha fatg attent a l'impurtanza da talas definiziuns ch'influenzschian la legislaziun ed anc pli sever las determinaziuns en las ordinaziuns. En scadin cas sa fatschenta il cussegl naziunal anc ina giada cun l'iniziativa da la uniun purila u meglier ditg cun la cuntraproposta dal cussegl dals chantuns. Il cusseglier naziunal grischun e pur ha

menziunà las proximas discussiuns en differents gremis da l'Uniun purila svizra. Na vegnia la cuntraproposta dal cussegl dals chantuns betg flailentada dal cussegl naziunal possia senz'ater capitar che l'Uniun purila svizra respectiv il comité d'iniziativa retiria l'iniziativa. Campell è persuadi ch'i saja pli simpel da chattar ina maiorità tar il suveran svizzer per ina cuntraproposta che per ina iniziativa. «La dumonda da retrair l'iniziativa sto vegnir ponderada bain.»

## A disfavour da l'agricultura da muntogna

Duri Campell n'ha betg snegà che sia simpatia tant per l'iniziativa sco per la cuntraproposta è restenschida e quai ord optica da l'agricultura da muntogna. El ha ditg che l'iniziativa da l'Uniun purila svizra saja ina reacziun sin la politica agrara 2014/17. Principalmain nà dals purs da la Bassa vegnian las stentas da rinforzar la produziun. Cun questa produziun haja l'agricultura da muntogna dentant fadia da concurrer. Ina midada da la politica agrara tenor la veglia da l'iniziativa da l'Uniun purila svizra pudess esser da dischavantag per l'agricultura da muntogna. Las iniziativas inoltradas èn vegnidas lantschadas per influenzer la discussiun politica en il parlament che discutescha insacura la cuntinuaziun da la proxima perioda da la politica agrara. Sa fatschentar sto il parlament insacura era cun l'iniziativa lantschada dal pur *Armin Capaul*. Ina iniziativa inoltrada il mars 2016 cun 120 000 suttascripziuns che vul ina formulaziun constituziunala che pussibilitescha da sustegnair finanziain biestga cun corna. Grazia a quel sustegn finanziain speran ils iniziants che pli blets possessurs da biestga laschian a lur animals la corna. Il cussegl federal propona al parlament da refusar l'iniziativa.